

# ÇIROKA MALBATA EVDO

*Firat Cewerî*



NÜDEM

**ÇIROKA MALBATA EVDO**

# ÇİROKA MALBATA EVDO

*Firat Ceweri*

NÜDEM

Weşanên NÜDEM 39  
Çiroka Malbata Evdo  
Stockholm: 1999

© Weşanên NÜDEM  
Pergala bergê û rûpelan NÜDEM  
Wêneya bergê: Beşek ji bergê pirtûka Yılmaz Guney ya bi navê "Boynu  
Büktük Öldüler"  
Çapa bergê: Jakobsbergs Tryckeri  
ISBN: 91 88592-39 1

Box 177  
177 23 Järfälla-Sweden  
Tel û Fax: 8-580 131 62  
8-583 564 68

## ÇEND GOTIN

**Çiroka Malbata Evdo** ji çavkaniya bûyereke rastî hatiye hûnan-din. Navêñ gernasêñ çîrokê û navêñ cih û deran jî rast in.

Gernasê vê çîrokê Evdo, pismamê min e. Min bûyer bi çavêñ xwe dîtiye û ez jî destpêkê heta dawiyê bi wan re bûm.

Min di sala 1979an de li welêt dest bi nivîsandina vê serpêhatiyê kiribû û di dawiya sala 1980yî de ew li Swêdê xelas kir. Min hingî ev çîroka ha nîşanî R. Zîlan jî dabû. Şiret û pêşniyazên wî yên di derheqa zimêñ de pir bi kêrî min hatibûn. Ez gelekî spasi wî dikim.

Paşê min di sala 1981ê de çîroka xwe bi deqtilo nivîsand û çend kopyayêñ wê derxistin. Min dixwest ez çap bikim lê îmkan tunebû. Di sala 1983an de min kopyayeke wê ji rehmetiyê Qanatê Kurdo re şand Lenîngradê, da ku ew jê re pêşgotinekê binivîsîne. Qanatê Kurdo bi nameyekê hezkirina xwe anîbû zimêñ û li ser ji-yana min hin agahdarî xwestibû. Lê berî ku Qanatê Kurdo bigihî-je pêşgotinê binivîsîne, wî wefat kir. Çîroka min ma. Êdî min bêtir meyla xwe berdabû ser prosayê (nesrê) û min dev ji nivîsandina bi vî celebî berdabû. Paşê îmkanê çapê çêbû jî lê min nexwest ez çap bikim. Min nedixwest ez bi vî şiklî çap bikim. Ez demekê fikirîm

ku wê mîna roman an jî piyes binivîsinim, lê ew jî nebû. Êdî min ew bi tenê weke bîranînekê hilanî bû. Pişti 17-18 salan, min îsal ew derxist û xwend. Min xwend û min rojêن buhurî bi bîr anîn. Rewşa karkerêن pembo û bêçaretiya wan hat ber çavêن min. Di bîranîna salêن buhurî de resimekî salêن hefteyî di serê min de diyar bû. Gelek tişt hatin bîra min. Wê ji ber tesîra 18 salêن surgunê û dûriya ji welêt be, ez hisî bûm. Loma min biryar da ku ez vê berhemê çap bikim û gernasên wê di bîranînan de zindî bihêlim. Ci di aliyê zimên de ci jî di aliyê naverokê de min tu guhertin di vê berhemê de nekir.

Bêguman ger min îro ev berhem binivîsanda min ê bi awayekî din, bi raman û felsefeyeke din, bi celebekî din ê edebî binivîsanda; lê ez ê tu carî evqasî realîst nêzîkî mijarê nebûma û ez bawer na-kim ku min ê bikarîba zimanekî weha zindî û xwezayî bi kar bi-anîya.

Bi hêviya ku wê bi dilê we be...

Firat Cewerî  
Stockholm 1998

## **ÇİROKA MALBATA EVDO**

Maleke donzdeh kuflet  
Ya Evdo lawê Eshed

Li Balfisê dijiyân  
Hûr û mezin dil bi jan

Tim li nav çol û erdan  
Kevir û kuç vêdidan

Ji bo ku wek hevalan  
Ew jî rûnîn ber malan

Ne min got donzdeh kes bûn  
Ji bo wan ew ne bes bûn

Heft heb law û sisê qîz  
Tev paqij wek rûnê hîz

Diya wan a nâv Zergê  
Digot qey wê rojek bê

Vê qedera bêmirêz  
Em ê bixînin bi hêz

Wan pir rê didan ber xwe  
Da ku bibin serbixwe

Li beriya Dêrikê  
Wek qijnik û gêrikê

Geh xizmet û geh palî  
Dikirin li her alî

Lê rebenan tim birçî  
Tim belengaz tim bê cî

Ew li hev rûdiniştin  
Bi gazin û bi gotin

Ax li vê cîhana han  
Em reben û perîşan

Timî stûxwar in em  
Bê rêzan û devbigem

Mezinê malê Evdo  
Digot xêr e çi ye lo?

Vê dêlika felekê  
Wê me têxe ser rêkê

Hingî em ê jî helbet  
Parîk nanê bê minet

Bixwin weke însana  
Wê bimire ev jana

Li wî gundî tenê ew  
Bê şîr û mast û dew

Req û rût û birçî bûn  
Bê erd û bê xanî bûn

Rokê dawiya havîn  
Wan li malê kir civîn

Wextê çinîna pembû  
Da ku ew jî herin zû

Ew deynin qûtê salê  
Dîs vegerin bêñ malê

Li hev kom bûn jin û mîr  
Li mal hiştin ên bêkêr

Bi koçmalî ketin rê  
Dîsan wek karê berê

Çûn hêla Nisêbînê  
Xizmet bikin bo jînê

Kon vegirtin li nav erd  
Ji xizanî dil bi derd

Ji deh salî ta pêncî  
Li ser pembo bûn bi cî

Tenê Evdo û Besê  
Ew mabûn li Balfisê

Evdo tim carna digot  
Xwezî ez bibûma xort

Lê çi mixabin hûn xort  
Bûne naylon wek min got

Çi ye digot ev çi hal  
Hûn bê welat û bê al

Tîm digot dest bidin hev  
Wek bira hûn rabin tev

Pêşverû bû û dilxwaz  
Lê hewceyê rûn û gaz

Piştî çendakî ew jî  
Ket rê bi hiş û mejî

Çû gihişt ba karkeran  
Da bide hev pir peran

Karkerên li ser erdan  
Ne xerîb bûn tev pismam

Evdo ji wana pirsî  
Hûn çawan in balfisî?

Peyakî henekker bû  
Bi emir navsere bû

Pir henek kir wê şevê  
Tevî çiroka devê

Dû re Evdo zû pirsî  
Kanî bermalya Weysi?

Çavên wî zûka lê ket  
Weke tîrek li dil ket

Got ev çi ye Helîmê?  
Jehr têkeve vê jînê

Helîmê bûka wî bû  
Pîreka kurê wî bû

Tîm nexweş bû rebenê  
Lê kar dikir wek genê

Ji bo ku peyv neyê ser  
Wê kar dikir bê hember

Gava Evdo weha got  
Dil û ceger li wê sot

Zergê gote civatê  
Derbas bin hundur ba tê

Şîva wan a li ser ar  
Zergê çû ew danî xwar

Dû re got şîv hazir e  
Şîv tirşik û bulxur e

Kerem bikin ser sifrê  
Wextî kekê Elî bê

Evdo dîsan keniya  
Got hey xezala çiya

Zergê jina Evdo bû  
Eslê wê ji Kelê bû

Ne jin bû wek zilama  
Ne xwende bû lê zana

Evdo pesnê wê dida  
Digot şikir ji Xweda

Ku ev jina daye min  
Ez kirime serbilind

Zergê sifre hazır kir  
Pêşî bang zilaman kir

Zilam çûne ser sifrê  
Gişan gotin ya Xwedê

Evdo pîvazek jî xwast  
Got ma heye çeqilmast?

Mahmûdî pê keniya  
Got heye goştê miya

Mahmûd peyva xwe dom kir  
Berê xwe b' Evdo vekir

Dîsan keniya û got  
Pezên ku me îşev dot

Ka wî şîrî hûn bînin  
Ber Evdo axa dînin

Bi kêf û bi henekan  
Dixwarin tîrşik û nan

Zîna Mamê got Evdo  
Ka rewşa gund bêje lo

Dev ji henekan berdin  
Em tev bi kul û derd in

Ji birçîna bûn koçer  
Digerin li çol û der

Hinan ji me mal hiştin  
Hinan jî zarok û jin

Zînê hîn jî pêş de hat  
Dil radibû dadihat

Lawê Zînê ê mezin  
Ji wan ew mabû li gund

Zînê ji ber bi tirs bû  
Ber ku lawik durust bû

Şoreşger bû û zana  
Ji bo mafê însana

Wî kurî tim şer dikir  
Şerekî baş û ji dil

Ji ber vê yekê Zînê  
Digot ax li min dînê

Ger ev kur were girtin  
Pêt dikeve mala min

Çavêن Zînê zû şil bûn  
Dilê wê tije kul bûn

Evdo bersiv da û got  
Ew zîrek in xort in xort

Ew ê tim bikin xebat  
Ta ku em bibin felat

Zilaman êdî têr xwar  
Ji tirşikê û girar

Zilam paş de vekişyan  
Dor êdî bû a jinan

Îcar zarok û pîrek  
Li ser sifré bûne yek

Li pir hêlên Kurdistan  
Hê jî ev toreya han

Zilam digel pîrekê  
Rûnanin ser sifrekê

Tim berê zilam dixwin  
Dû wan re zarok û jin

Zilaman merş raxistin  
Cigarên xwe vêxistin

Piştä xwe dan behlîfan  
Lingên xwe ber xwe berdan

Dinya baş tarî bûbû  
Tenê ji kon diçû dû

Ji gundê nêzîkî wan  
Küçik bilind direyan

Şev ker bûbû û tarî  
Ewr xwe dabû her alî

Carna dikire gir-gir  
Carna jî barana gir

Konê wan zûka şil bû  
Hew ji kon bilind bû dû

Ba û bahoz û baran  
Dengê birûsk û ewran

Li wê çolê belav bû  
Pir neçû lehî rabû

Zarok û jin û zilam  
bê zar û bê çare man

Hinan gotin bismilah  
Hinan got emrê Elah

Lê dîsa Edvo rabû  
Got gidî ci bela bû

Zarokêñ hûr ên şîrmij  
Bi ser avê ketin giş

Qîr û wîra pîrekan  
digihişte asûman

Qaf û qûtê rebenan  
Tevî nan û danê wan

Giş bi ser avê ketin  
Digel wî konê mezin

Nav wî zevî bûbû ceng  
Qîj û wîj eman û deng

Evdo wa bi dengê hêl  
Gazî kir got dihêt pêl

Hûn tev xwe bidin alî  
Ev xezeb e dibarî

Bi zar û zêçan ketin  
Got em dev ji mal berdin

Li ser riya qîr û zift  
Hatin ser hev pale giş

Lê kon û xwarina wan  
Belav bû li nav erdan

Tenê req û rût mabûn  
Ji mirinê xelas bûn

Piçkî çû dinya vebû  
Ewrî ji hev belav bû

Ba û baran rawestîn  
Ew ber bi gundan revîn

Xwe gihadin gundekî  
Her yek çû mala yekî

Kincên li xwe guhertin  
Di cihê xwe de ketin

Lê wisan zarokên wan  
Dinaliyan digiryan

Evdo giş vehewandin  
Got xwe kar bikin rabin

Em bidin rê herin mal  
Jehr têkeve mal û kar

Apê Elî got nabe  
Divê pembo xelas be

Evdo pirsî got çima?  
Nabînî rewşa jina?

Elî got ev qet nabe  
Axa mafê me nadê

Dibêje pemboyê min  
Hûn ê gişî biçinin

Elî çawîşê wan bû  
Hem jî merivê wan bû

Wê ci bikira reben  
Nezanê hem dev bi gem

Evdo îcar wa bi hêrs  
Bi qûnkişkê hate pêş

Elî re got bide rê  
Em herin mala axê

Elî got Welleh nabe  
Ew dev ji me bernade

Evdo îcar bi hêrs go  
Rabe bide dû min lo

Bê razan û bê sebir  
Wan ew şeva derbas kir

Paşê herdu derketin  
Bi ser riya gund ketin

Rê bi herî çirav bû  
Dîs lehî li wan rabû

Bi zor xwe gihadin günd  
Kincên wan şil bûbûn rind

Di gund de ew berjor bûn  
Ber bi mala axê çûn

Li ber hewşê sekinîn  
Ew hinekî fikirîn

Tev pêlavêن bi herî  
Hêdîka çûn ber derî

Li derî kirin teqteq  
Kurekî axê derket

Got ma hûn ci dixwazin?  
Çima evqas dikazin?

Wan bi zûka bersiv dan  
Gotin me nîn e hedan

Wan zû pirsîn ji lêwik  
Kanî bavê te kurik?

Got li oda banî ye  
Dema xwarina wî ye

Pêlikan de berjor bûn  
Ber bi oda banî çûn

Hêdî li derî xistin  
Dengekî nizim kirin

Ka derbas bin hûn kî ne?  
Mêvan in an gundî ne?

Hêdî derî vekirin  
Wan çav li axê kirin

Rûniştibû çarmêrkî  
Xezeb difûrya ji wî

Hundur tev raxistî bû  
Tev paqij û şuştî bû

Li hawîrdora dîwêr  
Neqişandî weke zêr

Çarmedorî behlîf bûn  
Tev behlîfên hirî bûn

Wêneyekî bavê wî  
Bi dar de bû li ser wî

Rawestan li ber derî  
Mîna du kesên mirî

Axê her xwarin dixwar  
Serî ranekir ji xwar

Sifra wî sifrek fire  
Ji wan siniyên gire

Ji xwarinê ew mişt bû  
Tije goşt û birinc bû

Kevçiyê dawî danî  
Nû serî hilda banî

Got wan solên bi herî  
Deynin ber devê derî

Û derbas bin hunduro  
Ka bê we xêr e wilo

Solên xwe ji pê kirin  
Şelwerên xwe hilkirin

Û ew derbas bûn hundur  
Bi dilên keser û kul

Xwe dane ser çokêن xwe  
Û gotin ya dilê xwe

Axayê me ê delal  
Zaro divêñ herin mal

Êdî baran û lehî  
Bi serê te Wellehî

Em hew karin biçinin  
Me divê êdî biçin

Berî zar û zêçêñ me  
ew herin ji destêñ me

Destûr bide axê me  
Bide keda destên me

Axayê wan vê carê  
Xwe dirêj kir cigarê

Bi nermî çend hilm kişand  
Dest û rûyê xwe şidand

Paşê tirş û tal bû zû  
Nêv simbêlan berda dû

Cigara ku di destan  
Xwelîdankê de çekand

Serê xwe bilind kir jor  
Dest avêt simbêlên sor

Berê xwe bi wan vekir  
Birûyên xwe bilind kir

Dû re devê xwe dagirt  
Got min xwe pir li we girt

Ev pemboyê weke zêr  
Mirovên wek we bêkêr

Tev li ber lingan birin  
Mala min xera kirin

Hûn hîna jî bê fedî  
Pera divêtin gidî

Heta ku vî pemboyî  
Hûn neçinin hemûyî

Ez çerxîkî nadim we  
Ger Xwedê be bavê we

Evdo hebkî pêş de hat  
Êdî li ber axê hat

Got binere tu axa  
Ev kar nameşe weha

Berî ku birêje xûn  
Divê ku em bê pevçûn

Li hevdu bêñ wek biran  
Bide mafê karkeran

Axê li Evdo nêrî  
Got li min xwelî serî

Li kincik û rewşa wî  
Min re dike berberî

Elî got na xêr axa  
Em neghane wan çaxa

Çi ji më re berberî  
Ez bi qurbana serî

Em feqîr in belengaz  
Bo parîk nan û pîvaz

Ji xwe re dixebeitin  
Çi berberî û kuştin

Dîsan axa peyivî  
Got nadim we yek çerxî

Hûn ê vî pemboyê min  
Biçinin gişî ji bin

Îcar Evdo û Elî  
Li çavêن hev nihêrî

Paşê Evdo destê xwe  
Bi lez xist bêrîka xwe

Qutya xwe derxiste der  
Jî tûtina xwe ya zer

Cigarek qalind pêça  
Elî re got le vêca?

Dû re wî cigara xwe  
Xist nav herdu lêvên xwe

Bi hestê xwe ê berê  
Vêexist serê cigarê

Du hilmên kûr li ser hev  
Dû berda di poz û dev

Wa hêdîka îcarê  
Wî berê xwe da axê

Got çîma wa dibêjî  
Te fêhm nekirî hê jî?

Em ji te re dibêjin  
Em feqîr in bê hêz in

Ev zarokên me ên hûr  
Ser hev de dîkin zûr-zûr

Ger ew nexweş bikevin  
Em ê bin de bikevin

Ber ku em belengaz in  
Hewceyê rûn û gaz in

Bê dirav û bê mal in  
Ji feqîrî dinalin

Bê çare ne em reben  
Em xwediyyên kul û xem

Destûr bide em hêrin  
Da zaro ji dest nêrin

Mehek hate dagirtin  
Ku em zar û mêt û jin

Li nav vî erdê pembo  
Diçinin bi şev û ro

Lê em çi bikin niha  
Êdî nameşe weha

Di konan de nexusim  
Em qet nikarin razin

Em bê nan û xwarin man  
Em tev reviyan gundan

Lavelava jinêñ me  
Qîrînêñ zarokêñ me

Wan em ji guhan kirin  
Hişê serê me birin

Dibêjin em nikarin  
Digirîn û dikalin

Axa îcar bi qîrîn  
Got ez ê birjînim xwîn

Ez qet nadim we dirav  
Bes hûn bikin lavelav

Ger hûn dixwazin herin  
Li cendirman biggerin

Hûn li min gilî bikin  
Qala mafê xwe bikin

Evdo û Elî nerîn  
Pere nake bergerîn

Lê ne ji xwe bi zorê  
Axa nade wan dorê

Bi wan dilên bi birîn  
Herdu bîskê fikirîn

Paşê rabûn ber derî  
Solêن xwe ên bi herî

Xistin herdu lingên xwe  
Rahiştin çakêtên xwe

Dîs berêن xwe dan axa  
Got wê bimre ev çaxa

Gava ew derketin der  
Dîtin segekî mexel

Wî segî êrîş bir wan  
Lê zûka revî gavan

Segî ji wan veqetand  
Cihê wî de rawestand

Elî Evdo û gavan  
Ew bi hev re meşyan

Evdo wa di ber xwe de  
Got jiyan kul û derd e

Gavan li wî zîvirî  
Got ji bo çi ez gorî

Elî got lo ez xulam  
Rast e derd e ev jiyan

Derdêñ xwe jê re gotin  
Dil û ceger lê sotin

Gavan bi wan re daket  
Ta ku ji gund bi dûr ket

Peyivîn ew li ser gund  
Ser mirovêñ pîs û rind

Peyv zîvirî û peyv hat  
Hate ser kar û xebat

Evdo got xort rabûne  
Bo azadî kar bûne

Pir pêwîst e ku em wan  
Biparêzin bi çavan

Şer dikin bi roj û şev  
Bi zanyarî û bi dev

Ji bo jîna wekhevî  
Ji bo mal û bo zevî

Ew hertim vê dibêjin  
Yên ku xwînê dirêjin

Em ê wana bixînin  
Erdan ji wan bistînin

Li gundiyan belav kin  
Axan ji navê rakin

Gavê got lawê min jî  
Tim ji min re dibêjî

Dibêje ku divê em  
Bîşkînin merbend û gem

Derdê axê nemaze  
Kurê min qet ranaze

Piştî ku pevv xelas kir  
Derxist qutî û agir

Sê heb cigare pêça  
Ji bo xwe û ji bo wa

Cigarên xwe kişandin  
Xatir ji hev standin

Gavan vegeeria gund  
Ew jî rê ve çûne rind

Gîhîstîn gundê berê  
Cê karker li wê derê

Zarokêñ wana ên hûr  
Hatin pêşya wan ji dûr

Çend pîrek û çend zilam  
Ber derî bendî wan man

Ta ku Evdo û Elî  
Ew gîhîstîn ber derî

Bi hev re ketin hundir  
Berêñ xwe bi wan ve kir

Bi dilekî bi birîn  
Wan rewşa axê pirsîn

Evdo piçkî hızırî  
Paşê li wan zîvirî

Got paleno mixabin  
Em ê pembo xelas kin

Yan na mîrzayê axa  
Wê me bişîn destvala

Wî got hûn gilî bikin  
Qala mafê xwe bikin

Ez çerxîkî nadim we  
Ger Xwedê be bavê we

Bi hêrs got gelî pala  
Weha ye ev pergala

Em rencber bin bê rûmet  
Wê rewşê ev be helbet

Divê em hişyar bibin  
Li xebatê kar bibin

Van axan û van began  
Em wan bidin ber lingan

**Yan na em ê weha bin  
Ew ê tim ejderha bin**

**Gava Evdo weha got  
Ji wira hol bûn çend xort**

**Xwestin herin ser axê  
Wî têxîniñ bin axê**

**Bi gotin û bi gazin  
Evdo ew rawestandin**

**Paşê got xortên delal  
Wê bikeve ev pergal**

**Divê li hember dijmin  
Em pirî bi sebir bin**

**Va keç û xort rabûne  
Bo azadî kar bûne**

**Nemaze bo karkeran  
Ji bo mafê rencberan**

**Bi xurtî ne bi sistî  
Xebatek bi zanistî**

Dajon li dijî axan  
Li dijî stemkaran

Heçî karker û gundî  
Pêwîst e ku peywendî

Bi wan kesan re bikin  
Bi kuştin û bi girtin

Evdo hîn dipeyivî  
Li ser axa û zevî

Baş vebûbûn çavêن wî  
Ji wî difûrya hêvî

Dem derbas bû ji nîvro  
Ber bi ava diçû ro

Rabû mazûbanê wan  
Xwarinek danî ber wan

Palan destêن xwe şuştin  
Li dor sifrê rûniştin

Piştî ku xwarin xwarin  
Av bi ser de vexwarin

Cigarêñ ku li ber wan  
Pêxistin dûman berdan

Evdo li der nihêrî  
Rabû ber devê derî

Dest danî paş qûna xwe  
Ponijî li jîna xwe

Ber bi derive meşıya  
Çakêt li nava piya

Serê wî di ber de bû  
Cigare di dev de bû

Hebkî din jî meşıya  
Wî berê xwe da çiya

Got hûn cihê mîran in  
Hûn cihê pilingan in

Paşê serî berda jêr  
Û got em in ên bêkêr

Roya ku li ber ava  
Ew êdî diçû ava

Tîrêjên wêna yêñ tûj  
Dicemidî weke bûz

Jî rojantî ketibû  
Wek heyvê lê hatibû

Hêdîka çû paş benê  
Dest avête doxînê

Vekir wê doxîna sist  
Bi şelwer girt û rûnişt

Roya bûbû weke hêv  
Daket xwarê roj bû şêv

Evdo rabû ber bi gund  
Meşiya bi gavêñ rind

Ser sergo de berjor bû  
Ber bi malikê ve çû

Li derî xist ket hundir  
Weysî namek pêşê kir

Got bavo va ev name  
Gundîkî anî da me

Behcet ev nivîsiye  
Li halê me pirsiye

Paşê jî ew bi gazar  
Dibê pera dixwazim

Xwe davêje bextê me  
Dibê ez bê pere me

Berî ku mala Evdo  
Herin ser erdê pembo

Lawê Evdo î Behcet  
Ketibû bin çek û rext

Ango ew bûbû leşker  
Dûr çûbû ji welêt der

Evdo hebkî ponijî  
Ew name girt ji Weysî

Got tişt nabe lawê min  
Em ê pera bişînin

Lê kengî ku ev pembû  
Ew ji bin de xelas bû

Hingî ez ê bidim rê  
Herim ba mala axê

Pera ji wî bistînim  
Ji lêwik re bişînim

Paşê berî da palan  
Û got gelî hevalan

Bi xêr em ê sibê zû  
Herin ser erdê pembû

Pêwîst e ku hûn işev  
Firaxên xwe têxin tev

Ji bo ku çer em rabin  
Bi ser riya erd da bin

Karkeran gotin baş e  
Evdø rast e ne şaş e

Ew piştî şevbuhêrkê  
Her yek çûne hêlekê

Firaxên xwe xistin tev  
Ji eşâ derbas bû şev

Îcar bû çaxê xewê  
Giştik raketin li wê

Piştî ku bû sibê zû  
Evdo berî wan rabû

Wî bang palan gişan kir  
Yek bi yek ji xew rakir

Gava ku karker rabûn  
Li firaxên xwe kar bûn

Ew dan û savarên xwe  
Danîne ser milên xwe

Paşê ji gund derketin  
Bi ser riya erd ketin

Zarok, pîrek û zilam  
Giş bi rê de meşyan

Bi qasî nîvsaelê  
Ew gihîştin ser xakê

Çûn şûna xwe a berê  
Cihê kon li wê derê

Kon ji erdê rakirin  
Ji heryê paqij kirin

Paşê ji wan çend zilam  
Sing di erdê de kutan

Konê xwe zû vegirtin  
Pêşmalên xwe wergirtin

Gişan berî dan pembo  
Ji bîr kirin kulên do

Ketin serê berên xwe  
Û gotin kilamên xwe

Piçkî nav pembo de çûn  
Pêşmalên wan tije bûn

Çûn vala kirin telîs  
Dîs ewrekî reş î pîs

Bi ser wan de xwe berda  
Wan berên xwe dan Xweda

Gon ca bila dilê te  
Bisote bi halê me

Gotin ev çi xezeb e  
Qe tu dev ji me berde

Lê wê tavê wa bî hêrs  
Xwe berda ser wan bi hêz

Wek merşekê li esman  
Wê xwe vekir li cîhan

Bû girîn bi dû wê re  
Wek tu esmênbihêre

Wisa baran bariya  
Ewr wek ziha kişiya

Dîs li wê çolê bû deng  
Cih li wana baş bû teng

Vir de wê de reviyan  
Ew zû bi kon ve gihan

Xwe epişandin ser hev  
Ew roj li wan bû wek şev

Hingî ew ava bû şet  
Konê wan ser wan de ket

Xwarina wan a mabû  
Nav avê de wenda bû

Dîsan zarok girîyan  
Evdo got nema jiyan

Ax û wax bi wan ketin  
Ji binê kon derketin

Dîtin ku wî ewrê han  
Dîsan kişiya esman

Girîna ewr hat birîn  
Lê di wan de nema jîn

Belengazan zû rabûn  
Li danîna kon kar bûn

Wan konê xwe vegirtin  
Xwarinê xwe wergirtin

Ji wê xwarinê gişî  
Ji wan kîsikên tijî

Tenê kîsikek mabû  
Baş bû ku tije nan bû

Lê şil bûbû ji avê  
Vekir danîn ber tavê

Demê ɳîvro li paş hişt  
Karker pir birçî bûn gişt

Tıştekî wan nema bû  
Ne xwârin ne nan û dû

Ji bil ɳanê wan ê şil  
Ne pêxwarin ne bulxur

Lê ramanek pir paqij  
Karker lê fikirîn giş

Çend zarok hilbijartin  
Ji bo kuvarkan rakin

Zarok şandin kumikan  
Bê sebir benda wan man

Ew zarokên kuvarkvan  
Pir zûka vege riyan

Wan pir baş rakiribûn  
Tûrê xwe dagirtibûn

Nanêñ ku li ber tavê  
Ew ziwa bûn ji avê

Zergê çû anî hundir  
Li karkeran belav kir

Wê her yek perçek da wan  
Di tûr de sê-çar nan man

Wan zû ew kuvarkên sar  
Şuştin danîne ser ar

Wextekî kurt tê de çû  
Kuvarkan bilind bû dû

Beroşê peqilk veda  
Kuvark zûka keliya

Zergê rabû ew xwarin  
Belav kir li mîr û jin

Paşê para zarokan  
Wê danî ser nanê wan

Çend parî kuvarkên din  
Sêniyê de hilandin

Xwärna wan a êvarî  
Tenê mabû çend parî

Evdo rahişt şewqê xwe  
Berepaş da serê xwe

Paşê berî da palan  
Got de gelî hevalan

Va me zikê xwe dagirt  
Em rabin ser pembo xurt

Çend saetan bidin hev  
Berî li me bibe şev

Karker giş rabûn ser xwe  
Girêdan pêşmalên xwe

Çûn ketin serê pembo  
Ewr çûbû xweş bûbû ro

Çinîn nîv-saetekê  
Ji nav pîrekan yekê

Kir qîrîn got dilê min  
Ji hevdu ket ew ji bin

Verşiya li serê ber  
Verşîneke rengreş û zer

Hin karker çûn ser wêna  
Ew vekşîyan ji bêhna

Ew jînik bîskê li wir  
Wek tu agir berdî dil

Digot bavo dilê min  
Welleh perçe bû ji bin

Bavê wê lê nihêrî  
Guhertinek tê de dî

Dît ku rûyê wê ê sor  
Bûye kesk û zer û mor

Wan çavên reşbelekî  
Ew bûbûn zer û spî

Ji devan girêz diçû  
Dev bostekê vedibû

Bav got xêr e însallah  
Ev çi bobelat e Ellah

Xwe daqûl kir ser keçê  
Destê xwe da rûyê wê

Zû destê xwe kişand jê  
Wek tu agir berdiyê

Çi rûkî sincirî bû  
Wî rûyê wa nedîbû

Destên xwe da bin çengan  
Da wê rake ser lingan

Dît ku hejiya û ket  
Nikarîbû rabe qet

Hîn bi wê dilebikîn  
Kirin dengekî îskîn

Keça Weysî Fedîla  
Bi qîrîn digiriya

Hin karker çûn ser wê jî  
Ew digiriya hê jî

Kir nekir neverşıya  
Paşê rabû ser piya

Dilê wê li hevdu ket  
Rabû ser xwe dîsa ket

Paşê diya dilşewat  
Helîmê bi ser de hat

Got keçika diya xwe  
Hela tu rabe ser xwe

Karkerên ku li nik wan  
Rûnişt li ser tûtikan

Lê keçik ranedibû  
Tenê çav lê vedibû

Ew jî wek pîreka din  
Carna dihat hejandin

Piştî wextekî kurt  
Wê herdu çavêن xwe girt

Qîrîn bi Helîmê ket  
Got ji dest min çû ev keç

Dît ku dîsa çavêن wê  
Vebûn mîna ên berê

Keçik piçkî rûxweş bû  
Riwê wê li wê geş bû

Serê xwe hilda banî  
Got dayê avnê bînî

Dê bazda ber bi şerbik  
Jê tije av kir tasik

Anî da destê keçê  
Wê vexwar bi carekê

Wan jina din jî anîn  
Li ba Fedîla danîn

Karker tev hatin ser hev  
Saetek ma bibe şev

Pêşen xwe girêdan zû  
Çûn ketin serê pembû

Çinîn piştî şêst deqan  
Wan dev ji pembû berdan

Dawên xwe vala kirin  
Rahiştin kîsan birin

Berî dane qapanvan  
Li bênderê civiyan

Wan pembo wezinandin  
Kaxezêن xwe standin

Paşê çûn ba nexweşan  
Hinek ket bin milên wan

Rahiştin firaxêن xwe  
Berî dan çadira xwe

Ne me got xwarina wan  
Nemabû têra gişan

Tıştê ji ber wan mabû  
Ew zipî ziwa bûbû

Wan ew danîn ser êgir  
Li hev kom bûn hûr û gir

Sê-çar nanêن bin kîsik  
Zergê çû ew jî derxist

Gava ku kuvark germ bû  
Dîsa Zergê rabû zû

Çû ji ser êgir daxist  
Rahişt sifrê û raxist

Kuvark danî nîvekê  
Nanê xwe da kêlekê

Her yekî hinek xwarin  
Bi dû re av vexwarin

Ew hemû nîvbirçî man  
Man bê xwarin û bê nan

Ji bo qismetê sibê  
Wan xwe spartin Xwedê

Yek ji nava pîrekan  
Bi lez rabû ser piyan

Çû çira anî daxist  
Tije don kir û pêxist

Ew şev pir tarî bûbû  
Lê tenê kon rohnî bû

Çend stêrkên li esman  
Ew yek bi yek rijiyâ

Ne me got şet rabûbû  
Lê erd zû ziwa bûbû

Çend heb merşikên kevnik  
Çend heb jî kevnekincik

Wan li binî raxistin  
Paşê kulîn daxistin

Nivînên xwe rast kirin  
Xwe li ser dirêj kirin

Pal dan li ser nivînan  
Payiz bû ne zivistan

Ne pir sar bû ne pir germ  
Lê ew ditirşyan her dem

Hegerbihata baran  
Wê biketa konê wan

Baş bû ku wê şeva han  
Baran nehat ji esman

Lê raketin dilbitirs  
Nêr û mêt û hûr û girs

Hin xewnêñ tewlomewlo  
Di xewê de dît Evdo

Xwêdan lê bûbû zîpik  
Pir hêrs bûbû ew bê şik

Birûyêñ wî ên qalind  
Ew şil û pil bûbûn rind

Di wê navê de kabûs  
Bi awirêñ xwe ên tûj

Xwe tije kir xwe dagirt  
Xwe li ser Evdo raxist

Xwêdana li ser Evdo  
Hîn bêtir bû bû wek co

Evdo xwe piçkî leqand  
Kabûs hebkî wê de şand

Paşê jî bi yek derbê  
Got ya Ellah û Xwedê

Rabû li ser xwe rûnişt  
Derve dihat xişte xişt

Gava ew rabû ser pê  
Dît ku dinya diçe tê

Dîs xwe girt û zû derket  
Çavên wî li Mahmûd ket

Mahmûd daqûlkirî bû  
Bi verşinê bilî bû

Evdo lezand çû ser wî  
Dît ku herdu çavên wî

Bûne wek du fîncanan  
Fireh bûne wek tasan

Evdo rûnişt li nik wî  
Got xêr e Mahmûd gidî

Mahmûd got apo mirim  
Tu dibê qey bê dil im

Evdo got de ka bêje  
Kê dera te diêşe

Mahmûd got ser û hundir  
Ew li min bûne agir

Nişkav Evdo hejiya  
Û got belq û verşıya

Çav di serî de vebû  
Xwêdan dîsa lê der bû

Piçkî man çend gedên hûr  
Wan jî kirin zûrezûr

Bi kurtebirî ew giş  
Bûne mîna ên bêhiş

Hemû derketine der  
Riwêن gişan bûbûn zer

Dest î li ser zikên wan  
Wan diviyan verşıyan

Evdo got xêr e gidî  
Ev çi tiştên kesnedî

Ma ev çi bobelat e  
Bi serên me de hate

Mîna eşâ mirîşkan  
Ketibû di nêva wan

Cihê xwe de gêj dibûn  
Diketin û radibûn

Giş ecêbmayî mabûn  
Ew bi dian ketibûn

Nizanîbûn ku çi ye  
Ev nexweşî ji çi ye

Ew dinya reş û tarî  
Vedibû hêdî hêdî

Wê sar û seqema han  
Xwe berdidane ser wan

Bi girî û bi îskîn  
Ji êşê dirikrikîn

Nexweşya hina ji wan  
Pir dijwar bû û giran

Yên ku rewşa wana baş  
Li çîrokê mabûn şâş

Wan rahiştin lihêfan  
Avêtin ser nexweşan

Pîrek û zarokên hûr  
Her dikirin zûre zûr

Çav li wan bûbûn sorîn  
Hêşir bûbûn weke xwîn

Bêdeng bûn ew li erdê  
Xwe spartibûn Xwedê

Hebkî çû dinya vebû  
Dorhêl êdî rohnî bû

Roj derket ji paş çiyan  
Tîrêjêن xwe ên giran

Berda nav çol û erdan  
Xwe berda nav konê wan

Di kon de jî derbas bû  
Derbasî hunduro bû

Îcar ew roja hanê  
Bûbû weke hêlkanê

Xwe davêt vir û wira  
Ew bilind bû ji gira

Pîrek û zarokêñ han  
Hîna jî digiriyan

Nexweşêñ dirêjkirî  
Bûbûn wek meytêñ mirî

Evdo wa bi yek derbê  
Got ev çi ye lo Xwedê

Berê xwe da karkeran  
Dîsa got gelî palan

Got divê ku em rabin  
Bi ser van riyâñ da bin

Tîrîmpêlkê em bînin  
Van nexweşan hilînin

Gava Evdo weha got  
Rabûn ser xwe sê-çar xort

Bi lezîn û bi revê  
Wan berêñ xwe dane rê

Dîtin ku texsîk spî  
Ew weke ba dipekî

Gava gîhîstîn ser rê  
Dîtin yeka din jî tê

Destêن xwe jê re hildan  
Şofêrî dan rawestan

Yek nêzîk bû jê re got  
Me hene çend keç û xort

Ew nexweş in pir giran  
Ji bo xatirê Yezdan

Em wana zûka rakin  
Da ku em wan xelas kin

Şofêrî ji wan re got  
Ma ka li ku ne ew xort?

Yekî ji wan bi destâ  
Kon nîşanî şofêr da

Bazara texsî kirin  
Ser peran li hev kirin

Paşê ketin riya kon  
Çûn sekinîn li ber kon

Dengê giriyyê jinan  
Dîsa diçû asûman

Tew zarok qutîfî bûn  
Hemû zer û şîn bûbûn

Evdo gote şofêrî  
Alî me ke ez gorî

Wan alî hevdu kîrin  
Nexweş ji wir rakîrin

Yekî baş hilbijartîn  
Nexweşan re hinartîn

Şofêrî ajot û çû  
Ber bi Nisêbînê bû

Ew di rê de weke ba  
Mîna têyrêن li hewa

Wisa xurt û zû diçû  
Rê winda dibû ji dû

Li herdu aliyên rê  
Kevnerêçikêن berê

Ji rêwiyan ew mişt bûn  
Tev xizanêñ bi rişk bûn

Hin erebokên hespan  
Hin peya hin bi keran

Ber bi Nisêbîn diçûn  
Bo şekir û kîlok rûn

Lê texsiya nexweşan  
Weke ba û bageran

Pekî ji wanbihurî  
Hin nexweşan bi girî

Got zû bajo bi qurban  
Di me de nema jiyan

Şofêr ajot îcar xurt  
Makînêñ din li paş hişt

Zîvirî kete bajêr  
Nexweşan re got bi xêr

Hûn ê hemû xelas bin  
Rehet bibin û rabin

Ajot ber nexweşxanê  
Nexweşekî got anê

Şofêr çû kete hundir  
Bi dengekî gur bang kir

Got hey bijikê zana  
Rehetkirên însana

Ji bo xatirê Xwedê  
Hûn bi lez rabin ser pê

Çend doktorêñ cilspî  
Zû derketin ber derî

Erebok derxistin der  
Ew nexweş danîne ser

Derencan de hilkişyan  
Nexweş danîne odan

Li ser text dan rûniştin  
Cilêñ li wan derxistin

Çend şûşen tije derman  
Anîn danîne ber wan

Milêñ wan tazî kirin  
Ew hemû derzî kirin

Pere nekir ew derman  
Nexweş giş dihejîyan

Doktor li wan nihêrî  
Derzî nake tu perî

Çûn pirtûk li hev xistin  
Derzek din jê derxistin

Ji bo jehra kuvarkan  
Serûm berda canê wan

Lê ew nexweşan hê ji  
Wek bê hiş û bê mêtî

Dirêj bûbûn ew bêdeng  
Cih li wan baş bûbû teng

Ku demek di nav re çû  
Êdî çavêñ wan vebû

Piçkî ser xwe ve hatin  
Hinan ji wan av xwastin

Li wan nêrîn doktoran  
Ku baş dibe rewşa wan

Divê ew avê ji bin  
Qurtekê jî venexwin

Yê bi wan re hatibû  
Dît ku rewşa wan baş bû

Îcar wî xwest ku here  
Li yên dinê binere

Destûr xwest ji doktoran  
Tembîha wana da wan

Wek bayê derket derê  
Çû rawesta li ser rê

Li makînê siwar bû  
Tenga zevî peya bû

Berî da kon û lezand  
Ji Xanî helbestek xwand

Helbest li ser kurdan bû  
Ser kurdên perişan bû

Hîn wî ew helbest dixwend  
Qîj û wîjek pir bi deng

Hat herdu guhêñ wîna  
Cih de bû mîna dîna

Wî gavêñ xwe ramedan  
Û reviya bi bazdan

Çû li ber kon sekinî  
Ji xwe re çi dibînî

Hin zarok diperpitin  
Deverû ketine jin

Zarokêñ diperpitîn  
Bûbûn wek mirovêñ dîn

Zer û şîn û kesk dibûn  
Çavêñ wan fireh dibûn

Carna jî bi derbkê re  
Wek mirov wanbihêre

Bi xurtî diqîriyan  
Qîrîn diçû asûman

Tew tiştên ku kesnedî  
Wî di zarokan de dî

Ew zarok carina jî  
Dibûn wek darêن bejî

Lê tenê diranêن xwe  
Diavêtin laşen xwe

Goştikêن xwe dibirîn  
Laşê wan tev dibû xwîn

Pîreka Evdo Zergê  
Berê xwe dida Xwedê

Gazî dikir esheban  
Hem şêx û hem ewliyan

Lê hal tê de nemabû  
Bi çerm û hestî mabû

Hinarîkêن wek sêvan  
Bûbûn wek çermê solan

Bîrhêن wê ên pênuşî  
Bûbûn wek tayêن rizî

Gepêñ wêna kort bûbû  
Lê nema bû poz û rû

Evdo li wê nihêrî  
Got dê bimre Wellehî

Dû re çû ser zarokan  
Got bi navê esheban

Ger evêñ ha xelas bin  
Wê mirî hemû rabin

Lê ji xwe wîna bi xwe  
Her dixware laşê xwe

Lêvên wî daliqya bû  
Çav serî de nemabû

Rûyê wî yê girover  
Bûbû kesk û mor û zer

Simbêlên wî yên spî  
Ew bûbûne têl têlî

Tê de nemabû jiyan  
Bûbû rengê miriyan

Bi wê rewşê got Zergê  
Zû rabe ji bo Xwedê

Em xwe bighînin bajêr  
Di me de nemaye xêr

Zergê li wî nihêrî  
Got te divê tu herî

Tu tim li me wa dikî  
Mala me xera dikî

Evdo ma tu nizane  
Perê doktor giran e

Evdo got keçê rabe  
Jehr di nav peran da be

Zergê dîs li ber xwe da  
Got bi navê esheba

Ez ji vir nalebitim  
Ger zanibim bêm kuştin

Dû re bi dilşewatî  
Got ma Evdo te nedî

Behcetkê min ê zîrek  
Pê re nemabû ribek

Bo me silav şandibû  
Ji me pere xwestibû

Dîsa Evdo got keçê  
Zû rabe ji bo Xwedê

Em herin ser doktoran  
Da em nekevin devan

Bila qet xelk nebêjin  
Evdo tev zarok û jin

Wan ruh û canê xwe dan  
Ji bo mal û bo peran

Hingî Zerga min û te  
Li erdê bû berate

Herdu çav hatin girtin  
Wê xwe winda kir ji bin

Evdo bang kir got Weysi  
Lawo hûn mane sêwî

Zûka bazde lawê min  
Hûn makînekê bînin

Weysî derket û bazda  
Di rê de çû weke ba

Gava ku gîhîst ser rê  
Dît ku wa ye texsîk tê

Herdu destêñ xwe hilda  
Xwe bi ser rê ve berda

Gava texsî nêzîk bû  
Ew ber bi texsiyê çû

Şofêr got hey lo ehmaq  
Mafê te ne çend şîmaq

Got ma te xêr e wisan  
Xwe davî ber makînan

Weysî got ji bo Xwedê  
Dest min diçin bav û dê

Kerema xwe re bajo  
Berî here ava ro

Şofêr tew guh neda wî  
Bi xurtî ajot texsî

Weysî bi dû de bazda  
Got lawo ji bo Xweda

Welhasilî da gazê  
Wî Weysî hişt li ser rê

Pir neçû texsîke din  
Jor de hat xuyakirin

Weysî hêrs bûbû ji xwe  
Da ber çavan canê xwe

Gava texsî hat berê  
Wî xwe avêt orta rê

Dîsa got ji bo Xwedê  
Dest min diçin bav û dê

Şofêr lê derî vekir  
Berê xwe bi wî vekir

Dû re got xêr e qurban  
Bo çi ye ev kelecan

Weysi çîrok jê re got  
Dil û ceger li wî sot

Şofêr got siwar bibe  
Rê nîşanî min bide

Texsî serberjêrî bû  
Bi xurtî ber bi kon çû

Dîtin ku ew rebenan  
Ketine rengê dehban

Zergê û çend jinêñ din  
Ji xwe ew ber xwe didin

Tew Evdoyê qehreman  
Tê de nemabû jiyan

Weysi got zûka rabin  
Li texsiyê siwar bin

Dê çi bikin rebenan  
Nikarin rabin piyan

Evdo got rabe Zergê  
Qey ev e bela Xwedê

Gişan alî hev kîrin  
Jin li texsiyê kîrin

Şofêr xurt ajot û çû  
Ber bi Nisêbînê bû

Nexweşan hew nihêrîn  
Ew gîhiştin Nisêbîn

Lê wê rojê ew sûka  
Ji mezin û biçûka

Bi dev re tije bûbû  
Tev jin û mîr û zarû

Ji ber ku ew roja han  
Pir xweştir bû ji rojan

Dinya sar bû wê demê  
Lê wê rojê ji germê

Mirov çakêt diavêt  
Tena qutik û atlêt

Hingî zehf xweştir dibû  
Ji ber ku ew roj germ bû

Di wê navê de texsî  
Weke bazdana tazî

Di sûkê re derbas bû  
Ber bi nexweşxanê çû

Wê sûka bi pir însan  
Hemû ecêbmayî man

Hinan got neyarî ye  
Hinan jî got qeza ye

Lê hin jî ji wana çûn  
Nexweşxanê hazir bûn

Ew nexweşxana hanê  
Ketibû rengê xanê

Yên ku kuvark xwaribûn  
Zêdeyî bîst kesî bûn

Lê ji bilî wana jî  
Hebûn çend kesên din jî

Welhasil ew odena  
Tije bûbû ji wana

Wê demê ez nanopêj bûm  
Westiyayî û gêj bûm

Lawikek hate nik min  
Giriya û gote min

Got xweha te Helîmê  
Hatiye Nisêbînê

Ew lawik dîsa girî  
Min tişt fêhm nekir ji wî

Min got te xêr e kuro  
Ma ev çi rewş e wilo?

Got apo zûka heydê  
Apo Evdo te divê

Min dîsa jê fêhm nekir  
Min her nanê xwe vekir

Firina min sor bûbû  
Ji wê qet nedîçû dû

Nanê ku pê venijî  
Pir zûka digermijî

Perçak ji wî nanê germ  
Tırşikek xweş jî li cem

Min da bo wî kurê han  
Wî her got apo eman

Wî devê xwe nedayê  
Berê xwe jî nedayê

Hingî mîn zû têderxist  
Mîn pêşmalâ xwe daxist

Min zû bazda û ez çûm  
Raştî Elyê Remo bûm

Got birazî bo Xwedê  
Xwe bighîn nexweşxanê

Gava çûm nexweşxanê  
Rast bû bûbû wek xanê

Meşîm û ketim hundur  
Xweha mîn çav li min kir

Bi derbkê re çavên wê  
Herdu bûn mîna avê

Bi dilekî pir şewat  
Hêşir ji çavan dihat

Ku min berê xwe guhert  
Çavêن min li ên din ket

Te digot qey Balfisê  
Rabûye hatiye vê

Biçûk û mezinên wan  
Digel jin û mêtren wan

Li wir hatibûn ser hev  
Devêن wan ketibûn tev

Tev nezan bûn bê ziman  
Vir de wê de baz didan

Wan doktorêن cilspî  
Li wan nedibûn xwedî

Ez bûbûm wek doktoran  
Digeriyam li ser wan

Geh min ji wan dipirsî  
Geh jî min dînivîsî

Ji nav rewşa wan gişan  
Tenê rewşa pênc kesan

Zehf xerab û pîs bûbû  
Di wan de nemabû rû

Ez çûm oda doktoran  
Min wa bi hêrs gote wan

Min got rabin ev mirin  
Ca hûn li wan binerin

Yek ji nav wan zû rabû  
Ber bi nexweşan ve çû

Bo wan nexweşen giran  
Herkê derzîk nivîsand

Dû re min ew xewle kir  
Min pirsa rewşa wan kir

Got welle ez ci bêjim  
Nikarim tiştikî bêjim

Min got doktor bo Xwedê  
Bo min rastiyê bibê

Got ez nizanim kuro  
Rewşa wana a îro

Ew meşiya ji nik min  
Hingî min got giran in

Dîs vegeryam çûm ser wan  
Min dest da eniya wan

Eniya wan wek ar bû  
Ruh di wan de nemabû

Ji wê odê çûm a din  
Min dît hin ber xwe didin

Zû reviyam çûm ser wan  
Dikirin ax û eman

Rûyên wana zer dibûn  
Çav li wan spî dibûn

Kulmên xwe dışidandin  
Û dihatin hejandin

Dîsan ji wir derketim  
Ser riya doktor ketim

Ez çûm min derî vekir  
Doktor li min mîze kir

Got xêr e çi ye dîsan  
Hatiyî bikî pirsan?

Min got doktor beg mirin  
Çend zarok û çend heb jin

Min got zû rabe qurban  
Binêre li rewşa wan

Hingî ew rabû ser xwe  
Wî rahişt alavêن xwe

Em bi hev re meşîyan  
Çûne ser wan nexweşan

Doktor li wan mîze kir  
Got rakin Diyarbekir

Kula mezin îcarê  
Bi ser me de hat xwarê

Ji xwe çîroka peran  
Ew bû ya herî giran

Çil rojî kar kiribûn  
Lê pere nestandibûn

Xwediyê pembûyê wan  
Tu pere nedabû wan

Min dît ku tune çare  
Rakirna nexweşan re

Hingî ji wir derketim  
Çûm nik doktorekî din

Bi bergerîn û lavlav  
Min got me re bibe bav

Min got em qet tunene  
Bê mal û bê pere ne

Min got ma qe çi dibe  
Makînekê bidin me

Wana gotin çenabe  
Nîne makîneyên me

Dîsa li ber geriyam  
Min got ji bona Yezdan

Min kir û nekir nebû  
Ew doktor jî nerm nebû

Wî ne makîne da me  
Ne jî bû xwedî li me

Dîsan paş de vegeŕim  
Min dît ku hin digirîn

Hin ji hişê xwe çûbûn  
Hinek jî raketî bûn

Ji oda herî jêrîn  
Dengek hat min bi qêrîn

Bi wî dengî daketim  
Ez çav li Menco ketim

Keça wê a ku li dest  
Di destêن wê de dişkest

Çavêن wê beloq dibû  
Bi wê re nedima rû

Rû bûbû wek gîha şîn  
Di nav re dikir qîrîn

Menco berê xwe da min  
Got qurban mir keça min

Ji bo xatirê Xwedê  
Ji doktoran re bibê

Bila werin vê derê  
Binerin li vê keçê

Min got baş e jinamê  
Ez herim bêjimê

Lê min ê çi bigota  
An ji kê re bigota

Min serê xwe xist ber xwe  
Cigarek xist devê xwe

Ez weha bi poşmanî  
Hilkişiyam çûm banî

Apê min Evdo dîsan  
Got li me diêşe can

Ma ev çi doktorî ye  
Ev çi nexwêşxane ye?

Li vê nexweşxana han  
Nîne ji bil du sûtan

Qaşo ew ên zane ne  
Pir dîtî û xwende ne

Jehr têkev xwendina wan  
Ger ev be nêrîna wan

Dibînin ku em dimrin  
Ew li me nafikirin

Min got apo tişt nabe  
Tu bi ser sebrê da be

Got çi tişt nabe kuro!  
Ma qey ev dibe wilo?

Îcar em derketin der  
Rûyê wî baş bûbû zer

Çû li quncikê rûnişt  
Dîsa qutya xwe derxist

Wek rengê esrarkêşa  
Cigarek qalind kêşa

Piştî wê ew verşıya  
Jê hat ûrîna ziya

Ez gêj bûbûm wê demê  
Bûbûm mîna makînê

Dîsan reviyam hundir  
Min dît dimrin hûr û gir

Me pere peyda kirin  
Bangî makînan kirin

Û nexweş siwar kirin  
Ji wê xanê rakirin

Me ew birin Mêrdînê  
Da bidin wana jînê

Doktor zû hatin ser wan  
Wan jî serûm berdan wan

Lê paşê ew winda bûn  
Nizanim bi ku de çûn

Nexweşen me ên giran  
Di dêv de sist bûn ziman

Bi hejmar deh nexweş bûn  
Yên din hemû rabûbûn

Lê ev deh nexweşana  
Çi bêjim bo we zana

Hemû zer û şîn dibûn  
Dimirin û radibûn

Ji bo wê nexweşya wan  
Ne av û ne parîk nan

Diviyabû ew nexwin  
Qet nexwin û venexwin

Ji nav doktoran yekî  
Hat ser wan bi xweşikî

Got ger ku hûn bixwazin  
Dikarin bixwin xwarin

Wê demê hin nexweşan  
Qurtek av û parîk nan

Wan xistin ber dilê xwe  
Ji bîr kirin kulên xwe

Lê piştî wê xwarinê  
Serî hilda mirinê

Keçek biçük çar salî  
Mir li oda wî alî

Weke êşa mirîşkan  
Ket nava wan beşeran

Diketin diperpitîn  
Di wan de nedima jîn

Me dît rewş xerabtir bû  
Her ku çû girantir bû

Lê êşgiranbûna han  
Piştî wê xwarina wan

Xuyabû serî rakir  
Dilê wana perçe kir

Di wê navê de Evdo  
Gazî kir got lo derdo

Paşê serî bilind kir  
Berê xwe bi min ve kir

Got birawo em mirin  
Me ji vir rakin bibin

Nexweş pirî tirsîyan  
Ji wana çû ruh û can

Gotin ger rewş weha be  
Kesek ji me ranabe

Em fikirîn ponijîn  
Ku wê bimre ji wan hîn

Ji bo em wan xelas kin  
Divabû em zû rakin

Me pirsî bo Ankara  
Da em wan bibin wira

Ankara dûr bû ji wir  
Diviyabû perên pir

Nas û dost û hevalan  
Dixebeitîn ji bo wan

Nemaze şoresgeran  
Ji bo wana didan can

Di wê demê hinekan  
Li wira kirin civan

Got em rakin Amedê  
Doktor pir baş in li wê

Ji bonî wan nexweşan  
Me vir de wê de bazdan

Welhasil bi mirîti  
Me bar kirin bi xurtî

Du dolmîşên wek agir  
Berî dan Diyarbekir

Rê de diçûn weke ba  
Wek makînên daweta

Gava çûn Siltan Şêxmûs  
Qudretê tenê got kûz

Paşê deng jê biliya  
Êdî hew tevliviya

Lê hîn diçûn pir bi xurt  
Rêwî tev li dû dihişt

Baqî pir bi heyecan  
Berê xwe da nexwesan

Wî xwest ku cara pêşî  
Bibîne bavê Weysi

Ew ditirsiya hero  
Ji bo apê xwe Evdo

Wî pêşî dest da ser wî  
Li dev û çavan nêrî

Dît ku ew hîna dijî  
Dilebitin çavên wî

Paşê dest da Qudretê  
Baş nêrî li çavên wê

Çav bûbûn weke tasan  
Ling bûbûn wek misasan

Baqî got ax mala min  
Welleh mir dotmama min

Lê nehişt dê-bavê wê  
Bibhîzin mirina wê

Mîna ku tunebû tişt  
Evdilbaqî dîs rûnişt

Ew dolmîşan hîna jî  
Wek kîroşk û wek tajî

Bi tîtîn û bi girîn  
Li dû hev diçerixîn

Ku gihan Diyarbekir  
Evdo çavêن xwe vekir

Bi dengekî ne zelal  
Du peyv ji dev hatin xwar

Got Evdilbaqiyê min  
Çawan in zarokê din?

Evdilbaqî got apo  
Rewşa wan pir baş e lo

Paşê Baqî jê pirsî  
Got apo qet metirsî

Bi xêr hûn ê tev rabin  
Ji vê rewşê xelas bin

Piştî wan peyvêن hanê  
Gîhiştin nexweşxanê

Nas û dost û hevalan  
Hemû hatin alî wan

Ew daxistin û birin  
Li odan dirêj kirin

Qudretê keça xama  
Dolmîşê de tenê ma

Hin ji wan nexweşnêran  
Dawiyê pê hesiyan

Bihîstin ku Qudretê  
Zûde çûye rehmetê

Tenê nexweşên giran  
Bi wêna nehesiyan

Îbram û Evdilbaqî  
Evdilqadir û Weysî

Herçar li hev rûniştin  
Hin rê ji hev derxistin

Gotin em vê keçikê  
Rakin bibin Balfisê

Îbram ji xwe neqandin  
Bi keçikê re şandin

Hersên din bi dilkulî  
Fena sê kesên mirî

Di derî re derbas bûn  
Ber bi nexweşan ve çûn

Dîtin ku nexweşen wan  
Dikin qîrîn û eman

Lê doktorêñ cilspî  
Êdî li wan bûn xwedî

Ji bo wê nexweşya wan  
Vir de wê de baz didan

Pirtûk li hev dixistin  
Rê ji hev derdixistin

Wana hîn ew nexweşî  
Nedîtibûn li kesî

Gava ku ew vegeŕîn  
Gon lazim e hinek xwîn

Kuvark tev bi jehr bûne  
Xwînê de belav bûne

Ji ber jehra giran e  
Damar tev riziyane

Loma wana gotin xwîn  
Zû bigerin û bibîn

Kula mezin û giran  
Nû ve xwe berda ser wan

Ew ê ji ku bibînin  
Xwîna mirovan bînin

Nexweşnêrên li nik wan  
Xwîn nemabû di giyan

Belkî çar rojêñ temam  
Nexwaribûn av û nan

Ber vê yekê bûbûn şîn  
Sekinîbû don û xwîn

Hîn wilo Evdilbaqî  
Li doktor kire gazî

Doktor rabû çû nik wî  
Got xêr e çi dixwazî?

Wî got doktor min divê  
Ez ji xwe berdim xwînê

Nemaze bo apê min  
Ger zanibim bimirim

Doktor li wî nihêrî  
Got hela wê de herî

Xwîna di te de maye  
Ew hemû ziwa bûye

Wê demê de çend ciwan  
Kom bûn li nik doktoran

Milên xwe rapêçandin  
Tim diçûn û dihatin

Wan digotin me divê  
Xwînê bidin wek avê

Baqî ji wana pirsî  
Got me qet hûn nenasî

Xortan lê vegerandin  
Gon hevalan em şandin

Baqî got heval kî ne  
Hûn ji me re şandine?

Xortan gon em şoreşger  
Yên kar dikin ji bo gel

Hingî Baqî got fermo  
Hûn sed carî bijîn lo

Doktoran ew dan dû xwe  
Birin hundur oda xwe

Qutikên wan jê kirin  
Li ser text dirêj kirin

Derzî xistin milên wan  
Serê şexs şûşek xwîn dan

Doktor bi lez û bezan  
Xwe gihand ser nexweşan

Xwîn tevî serûman kir  
Berda canê wan ji dil

Hingî ew nexweşen han  
Baş bûn piçkî kewiyan

Nexweşxane mişt bûbû  
Tije hûr û gir bûbû

Du birîndarêñ giran  
Li oda nêzîkî wan

Ruh ji wan çû û mirin  
Xwedyêñ wan hatin birin

Belkî pêncî heb mirov  
Tev rebenêñ ku ne hov

Bi qîrîn digiriyan  
Qîrîn diçû asûman

Nemaze jineke pîr  
Bi wan destêñ wek hevîr

Ser çavêñ xwe diqelaşt  
Hedan ji Xweda dixwast

Bi dilşewatek giran  
Sitiran davêt ser wan

Zarok û pîrekên din  
Bi girî û bi him him

Vir de wê de bazdidan  
Wan jî davêtin ser wan

Piştî demek tê re çû  
Evdo got Zergê ci bû?

Zergê got Welleh nizam  
Hin ji derve digiryan

Evdo got nebe keçê  
Hin ji me bin bo Xwedê

Zergê got dengekî nas  
Nehat guhê min evqas

Hîn welê dipeyivîn  
Çavêن Zergê lê livîn

Evdo got keçê xêr î  
Qey tu dikî bimirî?

Deng ji Zergê derneket  
Diranên wê li hev ket

Evdo dîsa jê pirsî  
Çi dibe diya Weyesî?

Lêvên Zergê çû û hat  
Bi zor du peyv jê derhat

Got Evdo va dimirim  
Lê rewşa Behcetkê min

Dengê dawî ku derket  
Dîs peyivî bo Behcet

Got wî pere xwestibû  
Gotibû bişînin zû

Îcar bû mîna lalan  
Lê aliqî ew ziman

Bi lêvan dipeyivî  
Çavêن wê hew lê livî

Evdo got ax mala min  
Qey mir î bermalya min?

Hêşirên çavêن Evdo  
Bû wek çem û weke co

Xwe vir de wê de livand  
Ew serûm ji xwe kişand

Xwest xwe bighîne Zergê  
Carkê hemêz bike wê

Kir û nekir ranebû  
Çav serî de fireh bû

Xwe vir de wê de livand  
Tim kulmêن xwe dişidand

Evdilbaqî ket hundir  
Wek xencerkê têxî dil

Kir gazî û kir qîrîn  
Hêşirên wî hatin xwîn

Serê xwe da ser Evdo  
Bi qêrîn got lo Xwedo

Paşê serê xwe rakir  
Çavêن Evdo mîze kir

Çavêن wî jî bûbûn tas  
Ling lê jî bûbûn misas

Tenê herdu lêvên wî  
Mîna ku dipeyivî

Sê-çar caran çû û hat  
Gotin ji dev dernehat

Hingî Baqî reviya  
Berê xwe da gundiya

Got gundîno birevin  
Apo û amojin mirin

Gundiyan gon xêr e lo  
Ma ew çi rewş e wilo?

Baqî dîs got birevin  
Ap û amojin mirin

Pîrek û xort û zilam  
Giş bi xurtî reviyan

Hatin ser wan sekinîn  
Ên dilşewat zû girîn

Tenê di wê odê de  
Evdo û Zergê tê de

Textikên wan li nik hev  
Û çavêن wana ji hev

Qîj û wîjek pir bi deng  
Mirov digot bûye ceng

Wisan li wê deverê  
Li ser Evdo û Zergê

Ên porêن xwe weşandin  
Ên ku rû qelişandin

Nemaze jî pîrekan  
Pir bêtir digiriyan

Qîj û wîja wan dengan  
Li wê odê olan dan

Baqî got bisekinin  
Em wan zû rakin bibin

Nexweş nemabûn ji bin  
Ên rabûn ên ku mirin

Çend peyayêñ rîsipî  
Guh dane peyvêñ Baqî

Zûka makîne girtin  
Di nav xwe de hilgirtin

Ew xistine makînê  
Berî dane Mêrdînê

Gava nêzîkî gund bûn  
Gundî li pêş wan rabûn

Porê hinek pîrekan  
Bûbûn wek ên lawikan

Gişan reş girêdabûn  
Hêşirêñ wan dihat xûn

Gava Evdo û Zergê  
Daxistin danîn erdê

Hingî bi yek derbê re  
Wek mirov wanbihêre

Li ser Zergê û Evdo  
Hêşir bûne weke co

Dirêj kirin yek bi yek  
Dayik bav û hem jî keç

Hersê jî wek hev dirêj  
Pir paqij bûn ne qirêj

Zarokên wan ên hûrik  
Li wan perçe bûn dilik

Ji girînê çavêن wan  
Bûbûn derya hêşiran

Wê hewşa wan a mezin  
Tije biçûk û mezin

Gundî tev hatibûn wê  
Berêن xwe didan Xwedê

Berî vê bi sê mehan  
Dîsa jî evqas însan

Li wir hatibûn ser hev  
Heftekê bi roj û şev

Gume-guma defê bû  
Zire-zira zirnê bû

Lê hingî kêf û henek  
Kincêñ xweşik ên bi reng

Gişan li xwe kiribûn  
Tije xort û keçik bûn

Hingî daweta wan bû  
Menduhê pak zava bû

Dayika zavê Zergê  
Dia dikir ji Xwedê

Digot ev lawê sisya  
Ku min ew kirin zava

Hertim serê govendê  
Destmal di destê Zergê

Bi çarpîne bi lîlî  
Ew govend diherikî

Lê şûna wê kêfa han  
Bûbû axîn û eman

Gundî diçûn dihatin  
Tim hêşir dirijandin

Ji bonî wan meytêن han  
Meytşo kom bûn li ser wan

Ew şuştin bi fatîhan  
Dia kirin ji bo wan

Paşê ew kefen kirin  
Her çaran yek rakirin

Nîvê gund dane dû wan  
Ketin riya goristan

Bi hev re ew veşartin  
Vegeriyan û hatin

Zarokê Evdo ên hûr  
Wan dikirin zûre-zûr

Bi ser hev de digiryan  
Wan re namabû jiyan

Lê nemaze Aydinkê  
Hertim digot dayikê

Tu min jî bibe ba xwe  
Min têxe hemêza xwe

Ji kekê xwe ê mezin  
Weysî re dikir gazin

Weysiye wek zinarkî  
Bûbû wek darikekî

Xwîna wî sekinî bû  
Reş û zer û şîn bûbû

Wî ji bilî cigarê  
Tiştek nedavêt xwarê

Ew roj di ser wan re çû  
Gundî hemû belav bû

Wê şevê ta bi dereng  
Ji Weysî derneket deng

Wî zor dabû cigarê  
Difikirî bo malê

Di gumanan de pir çû  
Got gelo axa ci bû?

Malik li me şewitî  
Me ev axa qet nedî

Wî ne mafê me da me  
Ne xuya bû li nav me

Weysi sê caran got ax  
Vê feleka malkambax

Eger em tev mirov in  
Qey hin reben hin hov in?

Hin xwedî zevî û erd  
Hin jî xwedî kul û derd

Hin dimirin bi malî  
Hin kêf dikin sed carî

Piştî wan peyvên hanê  
Weysi bû wek hêlkanê

Pirça wî li wî gij bû  
Çavên serî lê gir bû

Xwêdan li ser bû zîpik  
Herikî ta binê ling

Wê şevê bi wî halî  
Jê re nebû debarî

Bi hêrsbûn û bi fikir  
Wî ew şeva derbas kir

Ew xwedî dost û nas bûn  
Hemû pê hesiyabûn

Gava ku bilind bû ro  
Hatin şîniyên Evdo

Ji dorhêlên Dêrikê  
Zarêñ ap û metikê

Ji Nisêbîn û Batman  
Hatin pismam û dotmam

Diyarbekir û Wêranşar  
Jê hatin dost û heval

Welhasil ji wan deran  
Dost hemû lê vehewyan

Şîna wana mehekê  
Dom kir li ser wê xakê

Nêviyê gund ê bêtir  
Hîn neguhertibûn cil

Lê ji xwe heçên zilam  
Dirêj bûbûn rihêن wan

Li nav gundê Balfisê  
Gişan digon mêtê çê

Ew tu caran pir najîn  
Li vê dinya derewîn

Lawê Evdo ê leşker  
Wilo li wir mabû kerr

Wî name li ser namê  
Dişandin boyî malê

Lê ji malê tu kesî  
Nedida bersiva wî

Ji ber vê yekê ew kur  
Dihizirî pir ji dil

Digot ger ev sax bûna  
Wê bersiv bişandina

Nama wî a dawî hat  
Weysiyî bersiv hinart

Got keko em kar dikan  
Bi malî çûk û mezin

Em çûne Nisêbînê  
Kar dikan li gundê wê

Em ê îsal pir peran  
Bidin hev bi hezaran

Bi xêr piştî mehek din  
Tê xelas kî werî gund

Em ê bi wan perên han  
Xwe re bikirin dehban

Bi kirîn û firotin  
Em ê karekê bikin

Piştî name xelas kir  
Canê wî bû wek agir

Bêî hemd hêşirên wî  
Rijiya ser nama wî

Wî ew name wisa şand  
Pir neçû Behcet stand

Gava ku Behcet vekir  
Hêviyên wî bûne gir

Piştî wê nameya han  
Behcet bû wek mirovan

Dikenî û kêt dikir  
Wî her digot pir şikir

Berê tim difikirî  
Bi îskîn û bi girî

Wî tu name nedistand  
Lê wî her name dişand

Wextê Behcet bi kêtî  
Derbas dibû li wî cî

Rojin ser de derbas bû  
Leşkerya wî xelas bû

Ew dûr bû li Qibrîsê  
Pirî dûrî Balfisê

Kinc mincên xwe dane hev  
Tev hevalên xwe bi şev

Li cîkî vehewiyan  
Kêf kirin wek mirovan

Paşê kete makînê  
Berê xwe da Mêrdînê

Rojekê û du şeva  
Ew bi Mêrdîn ve giha

Behçet rahişt çentê xwe  
Berê xwe da gundê xwe

Berî berbanga sibê  
Behcet gihişt Balfisê

Di nav gund re derbas bû  
Ber bi mala xwe ve çû

Çû ber derî sekinî  
Ji kêfan tim dikenî

Bi xurtî wa bê sebir  
Wî bangî diya xwe kir

Çû ber pacê sekinî  
Li pacê kir teqînî

Got lê dayê derî vek  
Ez im kurê te Behcet

Hingî zar û zêçên hûr  
Ser hev de kirin zûr-zûr

Weysî got Helîm rabe  
Ne Behcetê bira be?

Behcet got belê ez im  
De hûn hebkî bilezin

Hesen lawê deh salî  
Hingî rabû ber derî

Behcet re derî vekir  
Dû re hêşir paqij kir

Behcet got çi bû ye kur?  
Û bi êrîş çû hundur

Bavo ew çi bibîne  
Sê heb di mal de nîne

Hingî Behcet kir qîrîn  
Hêşirêñ wî hatin xwîn.

1979-1981

- ◆ Bûka Evdo, pîreka Weysî, Helîmê, ku xwişka min a mezin bû, di sala 1989an de gava mîna berbû ji Qiziltepeyê diçin Diyarbekirê, otomobîlên wan li Siltan Şêxmûsê radiwestin û berbû bêhna xwe berdidin. Di wê navê re keçika wê ya biçûk ku çar salî bû diçe ser rê. Gava diya wê dibîne ku ji jor de otobusek tê, bi xar baz dide ser rê da ku keçika xwe xelas bike, lê otobus li herdiwan jî diqelibe û herdu jî dimirin.
- ◆ Kurê Evdo, Weysî, di dema destpêka avabûna partiya HEPê de serokê HEPê yê Mêrdînê bû. Ew niha sekreterê Komeleya Mafêن Mirovan yê şaxê Mêrdînê ye û di YSEê de karmend e. Ji nû ve zewicî ye û mala wî li bajarê Mêrdînê ye.
- ◆ Keça Weysî, Fedîla, niha di ser bîstî re ye. Ji ber jehra kuvar-kan stûyê wê xwar bûye. Ew li ba bavê xwe, li Mêrdînê dimîne.
- ◆ Kurê Evdo, Hesen, niha komûtanekî gerîla ye. Li ku ye, sax e, mirî ye, nayê zanîn.

- ❖ Kurê Evdo, Menduh, ji ber xebatên siyâsî niha ji muebedê li Trabzonê di girtîgehê de ye.
- ❖ Kurê Evdo, Aydin, ku ji ber biçûkbûna xwe di çîrokê de bi navê "Aydinkê" dibuhure, niha zewizî ye û mala wî li Mêrdînê ye.
- ❖ Kurê Evdo, Behcet, mala wî li Manîsayê ye. Li gora agahdariyên ku gihîştine min ew niha di girtîgehê de ye.
- ❖ Pismamê Evdo, Evdilbaqî, ji ber xebatên xwe yên siyâsî mehkûm e.
- ❖ Gundê Balfisê, ku li jêrî Dêrika Çiyayê Mazî ye, van salêن dawiyê ji aliyê dewletê ve gelek tade û neheqî dîtiye. Gundî di iş-kenceyên nedîtî re derbas bûne, lê belê rûmeta xwe parastine û ranehiştine sîlehên dewletê.

**Çiroka Malbata Evdo** ji çavkaniya bûyereke rastî hatiye hûnandin. Min di sala 1979an de li welêt dest bi nivîsandina vê çîrokê kir û ew di sala 1981ê de li Swêdê xelas kir. Min heta niha ev çiroka ha li tu derê çap û belav nekiriye, lê min ew mîna rohniya çavên xwe parastiye. Ji ber ku ez yek ji şahidê trajediya gernasên çîrokê me, her ku min ev çîrok xwendîye dilê min ewçend perçe bûye, ez ewçend li ber wan ketime û bîranînê salênu buhurî di serê min de ewçend zindî bûne. Ji xwe armanca min bi çapkirina vê çîrokê ew e ku ez gernasên vê çîrokê di bîranînan de zindîbihêlim û rewşa karkerênen welêt ya kambax raxim ber çavan.

Bêguman, ger min îro ev çîrok binivîsanda, min ê ew bi celebekî din, bi uslûbeke din a edebî, bi nêrîn û felsefeyeke din binivîsanda, lê ez bawer nakim ku ez ê evqasî realist nêzîkî mijarê bibûma û dîsan bawer nakim ku min ê bikarîba zimanekî weha zindî û hêsan bi kar bianiya.

Firat Cewerî